

1. Тер цагт Ирод хаанд Иисусин тускар зэңг ирв.
2. Эврэннь зарцнртан эн келв: «Эн уснд кирслдг Иоанн .Үкснэ хөөн эмдрв, тегэд эн өврмжтэ йовдлмуд үзүлжэнэ.»
3. Филиппин ахин гергнэ төлэ Иродиадас көлтэ, Ирод Иоанниг бэрж авад, күлэд түүрмд суулһв.
4. Яһад гихлэ Иоанн келдг бээж: «Үүнлэ бээх чи зөв угач.»
5. Эн Иоанниг алхар седв, болв нутгин эмтнэс ээдг билэ, яһад гихлэ Иоанниг эмтн ээлдэч гиж тоолдг бээсмн.
6. Иродин һарсн өдрлэ Иродиадин күүкн ирсн гиичнрин өмн биилэд, Ирод хаанд йир икэр таасгдж.
7. Тегэд Ирод күүкнд цуг сурсинь өгнэв гиж андһарлв.
8. Эн экиннь зааж өгсэр келв: «Уснд кирслдг Иоанна толһаг тэвүр деер авч ир.»
9. Андһар өгсндэн болн ширэн өөр суусн гиичнрин өмн Ирод хан гейүрв.
10. Эн түүрмд бээх Иоанна толһа чавчад, күүкнд авч иртн гиж закв.
11. Иоанна толһаг тэвүрт авч ирэд, күүкнд өгв, тернь экдэн күргв.
12. Иоанна сурһульчнр ирэд, цогцинь авад оршав. Дарунь йовад Иисусд келцхэв.
13. Иисус энүг соңсад, һанцхарн тендэс көдэ һазрт онһцар усчад йовж одв. Эмтн Иисус тенд бээсинь соңсад, балһснас йовһар Терүг дахв.
14. Иисус һарад оln эмт үзв, эднд санань зовад, гемтәһинь эдгэв.
15. Асхн болад ирхлэ, Терүнүр сурһульчнр ирэд келцхэв: «Мадн бээх һазрт эмтэ юмн уга, ора цаг болж одв. Мадниг дахж ирсн улсиг хэрүлчктн, селэдэр йовад, бийдэн хот хулдж автха».
16. Иисус хэрү өгв: «Эднд йовх керг уга. Тадн хот өгтн.»
17. Эдн Терүнд келнэ: «Маднд тавн өдмг болн хойр заһсн бээнэ».
18. Иисус келв: «Нанд терүгэн авч иртн».
19. Дахад ирсн эмтиг ноһан деер суулһв. Эн тавн өдмг болн хойр заһс бэрэд, теңгр тал хэләһэд эдслв. Иисус өдмг авад, хуваһад сурһульчнртан өгэд бээв, сурһульчнрнь — эмтнд.

20. Цуг эмтн өгсн хотынь эдлэд цадцхав. Үлдсн хотнь арвн хойр зембльд багтв. 21. Хот эдлснь тавн миңн күн билэ, күүкд күн болн бичкдүд эн тоод орсн уга.
22. Иисус сурһульчнртан закв: «Шулун оңһцд орад, талдан көвөд күртн.» Бийнь ирсн улсиг тэвчкэд ирх болв.
23. Үлдсн улсиг тэвчкэд, тер асхн уул деер һарад һанцхарн зальврхар үлдлэ.
24. Оңһц теңгсин дунд күрв, дольгалсн усн оңһц цокв, яһад гихлэ зөрүд салькн өмнэснь үлэв.
25. Дөрвдгч сөөһин харулд Иисус теңгсин усна деегүр тедн тал йовж.
26. Сурһульчнр Энүг теңгсэр йовж йовхинь үзж. «Ки үзгдлһн!» - гиһэд ээлдэд хээкрцхэв.
27. Иисус теднд келв: «Сергтн! Энтн Бив! Бичэ ээтн!»
28. Петр Терүнд хэрү өгв: «Деед Эзн! Кемр Та болхла, би Танур усар ирхүв, нанд заквр өгтн!»
29. Иисус келв: «Йов!» Пётр оңһцасн һарад, усар йовад, Иисус тал өөрдж йовла седв.
30. Болв догшн салькнас эәһэд уснд чивн гив. Пётр хээкрв: «Деед Эзн! Намаг харсад авртн!»
31. Иисус шулуһар һаран татад, нөкд болад келв: «Баһ итклтэ! Чи яһад маһдлад бээвч?»
32. Эдн оңһцд орхла, салькн зогсж одв.
33. Оңһцд бээсн эмтн Терүнүр өөрдэд сөгдн келв: «Та йоста Бурхна Көвүн!»
34. Эдн теңгс һатлад Геннисаретск һазрт ирцхэв.
35. Тер һазрин эмтн Терүг таяд, төгэлндэн Терүнэ тускар зэңглэд, цуг гемтэ улсиг көтлж ирв.
36. Эдн Терүнэ хувцнднь һаран күргх зөв сурцхав. Һаран күргж чадснь — эдгцхэв.